

**Təntən sagı tə, Polə nə púpúní v  
pa  
Təsalonikə  
Kərisə lià tə nə  
Təsalonikə tián təntən sagı  
tə yuu wa sugu**

*Liù tə, v nə púpúní sagı kv tə  
Kv yı \*təntənv Polə nə púpúní kv.*

*Lià tə nə, Polə nə púpúní  
Sagı kv yı təntən sagı tə, Polə nə púpúní v  
pa \*Kərisə lià tə nə, ba nə wulə Təsalonikə nə.  
Təsalonikə yı kv wulə Masedwanə nagwanaa tə  
wa.*

*Sagı tə wa sugu*

Nəjə kv tə yırı, Polə nə púpúní ba nə: Polə nə  
dıga \*Kərisə lià púlí təntə dən Təsalonikə nə. Yá  
v dən yá mə, sə v dəri v jén \*Zwifə-ba duən yáá  
nə, ba nə wà v kàrà tə sèe, ba ga zıga v nə. Polə  
dán púpúní sagı kv tə, v pa Kərisə lià púlí tə nə,  
sə kv pa v tətəjı tə kwen kv tun kv va yáá wuuu.

Polə pià v bırı də, v pùé poli, yoo mama nə  
vəli zəni, Kərisə lià púlí nədən təntə wa yırı.  
Polə bwı ba nə, ba nə vəli yáá tə yırı, v dən ga  
daņa ba jìan, sə ba tə kwen ba tun kv ba doni  
nətv. Ba cígá yá dənì \*Yuu-Tiu Zwezi-Kərisə túrí  
tə. Yá twara yá jə Kərisə lià tə duən, ba duən yá  
nə ti də Yuu-Tiu tə wà twi tə yırı. Polə pià, sə v  
bırı ba tıga təntə yoo nə wá ya nətə.

*Polè jònì Kərisè lià tə Tesalonikè nə*

<sup>1</sup> À mù Polè də Siləven də Timote nə púpúní nə pɪn \*Kərisè lià púlí tə nə, kɪ nə wulə Təsalonikè nə. Kɪ púlí təntə də nyɪna Yɪ də \*Yuu-Tiu Zwezi-Kərisè nə vwə duən nə. Yɪ nə wá fwa pubwanɔ á yɪra, ɔ ga pa aba bɪcan sié.

*Nətv tə Tesalonikè lià nə ken ba waa Zwezi nə*  
(*Filipə tián 1.3-6; Kolosə tián 1.3-8; 1 Tesalonikè tián 2.13-14*)

<sup>2</sup> Nə yɪjɔnɪ mama wa, nə yàá lòrì Yɪ nə pɪn aba, na ga kəni Yɪ lèèè máŋá mama, á mama yɪrɪ. <sup>3</sup> Nə yàá líí á yoo máŋá mama, nə nyɪna Yɪ yáá con. Nə líí nə tián tɔtɔŋɪ tə, á nə keni á waa Zwezi nə, wuuu á ma tɔn. Nə líí nə tián də kɪ tə á sonu, tə nə tɔŋa də, á nə zɪga diàn yala tə wa, á nə jə nə \*Yuu-Tiu Zwezi-Kərisè con. <sup>4</sup> Nə nubɪa-ba, nə yèé də, Yɪ sóní aba. Ʋ kúrí aba, sə á ya ɔ mù lià. <sup>5</sup> Nə swìn suywánjú tə nə bɪrɪ aba. Kɪ tà də nii sùràn cɪcɪ, kɪ yɪn də Yɪ diàn tə də Yɪ-\*Siŋu tə tɔtɔŋɪ tə. Yá nə yà ba bèéé də, suywánjú tə yɪ cígá. Á yèé nə nə jɪn nə tián nətv, nə ja yà á tətəŋɪ wa, sə nə ma san aba. <sup>6</sup> Kɪ mù nə pɪn, á yɪ ndə nə mù də Yuu-Tiu nə yɪ nətv. Á dí càn zənzən, á ma jon Yɪ sugv tə. Yɪ-Siŋu tə nə pɪn aba pupwən. <sup>7-8</sup> Yuu-Tiu sugv tə zɪgɪ á con, kɪ ma yí Masedwanə nagwanaa də Akayi nagwanaa. Kɪ nətv dān pɪn á jì lià tə, Masedwanə də Akayi Kərisè lià tə mama nə mɛ, sə ba jì ndə á nə. Kɪ tə nə sùrí lá, ba swìn nətv tə, á nə keni á waa Yɪ nə, bwálí mama nə. Kɪ mù nə pɪn, nə mù con, kɪ ba dən jə, sə nə kúò

swìn ka yoo. <sup>9</sup> Llà tē mama yáa swìn nē yoo. Ba maŋa nētɔ tē, á nē sēe á ja nēba, máŋá tē wa, nē nē twi á con. Ba maŋa nētɔ tē, á nē lwán pubuŋi á bà Yui con, ku pa á sēe á dugu wonwanan, sē á ga tun á pa Yui nē. Yui tētē nē wulə mi wa, ɔ ga yi cígá. <sup>10</sup> Yá á dàń dàńi dē, ɔ biú Zwezi tē, ɔ pií ɔ bwin ɔ zìn tian wa, pií ɔ naŋa yi ɔ biàn. U mù Zwezi tē nē jon nēba Yui bura tē wa, ku nē biàn.

## 2

*Tutuŋi tē, Polə nē tun, Tesalonikə nē yoo  
(Tutunan 20.18-21, 31-35; 2 Korentə tián 4.1-2,  
5; 6.3-10; 12.12-15)*

<sup>1</sup> Nē nubia-ba, á tētē yèé ku zēni dē, nē nē twi á con tē, ku wà tutu yin. <sup>2</sup> Á yēni dē, nē dí càn dē ba fifin nēba Filipə nē, ku tē wà dàń. Ku kwa nē, nē nyina Yui pin fēn kù ba nēba jē, sē nē swìn suywánú tē, nē biri aba dē, yìèn nē swē tē ziga, sē tē cì ku yáa nē dē. <sup>3</sup> Nē kwìè tē, nē nē kwè llà tē nē wà kunkun, nē à yèé pubunkukwɔun sùràn, nē twá nē ma kwè ba. Yá nē wà sírí ken, sē nē pa ba jén. <sup>4</sup> Yui dàń nē ni dē, nē mē, sē ɔ pa nēba suywánú tē, ɔ ma pa ku nēba. Ku mù nē pin, nē dàń nē swìn ku tà, sē nē ma poli ləzoni pwií, ku ya, sē nē ma poli Yui pùé. U mù nē yèé nē pubuŋi tē dēń, nē lù nētɔ. <sup>5</sup> Ndə á nē yèé ku nētɔ, nē tē wà gɔgara sùràn swìn á con mama, nē ga tē wà sùràn swìn, sē nē ma pià sēbia. Yui yèé yoo tētē zēni. <sup>6</sup> Nē wà pià, sē nē na dun ləzoni yáa con, ku nē yi á mù yáa con, nē

à yèé ba duèn yáá con. Yá nè yà ga nè ya Zwezi-  
\*Kerisè \*tontona tē, nè yà wàá diàn nè dé á yuu  
wa. <sup>7</sup> Kú ga wà nētú yín. Nè waa yín bwàni á  
yuu wa máǵá tē wa, nè nè yín á con, ndè nuu  
nè ywàǵá ɔ bía yuu nētú. <sup>8</sup> Nè wɔbwanu tētē  
nè pín nè wà sóní, sè nè swìn Yú swywǵú tē  
cici nè bɪri aba. Nè sóní dē, kú nè yí tian dē, sè  
nè sèe nè tɪ á yiri. Kú nētú tē bɪri dē, á yoo cà  
kú pa nèba. <sup>9</sup> Nè nubia-ba, á dàǵ wàá á tiàn á líi  
tɔtɔncaran tē, nè nè yáá tɔn, dē gwaru tē kú nè  
yáá yí nèba yoo. Nè yáá tɔn tɪtɪn dē yɪcav, sè kú  
pa nè dàn ká ya á liù mama yuu zɪli. Yá nè swìn  
Yú swywǵú tē nè bɪri aba.

<sup>10</sup> Nè yín dē á mù lià tē, á nè keni á waa Zwezi  
nè wuuu, nè bɪri aba dē, nè yí lià tē, ba nè yí  
Yú nè tɪ, nè yí cíǵá tiàn Yú yáá con. Yoo mama  
yà tǵlé nè yuu wa, liù nè wàá nè nii nè ɔ caga  
kú yiri. Á mù ní kú tē, nè nè yín, Yú dē ga na  
kú. <sup>11</sup> Á yèé dē, kú tē, nè nè tɔn dē á liù mama,  
kú ya ndè nyina dē ɔ bía nè. <sup>12</sup> Nè kwè aba, nè  
pa á bɪcanɪ zùrì. Nè zɪǵi diàn nè lòrì aba, sè á  
yà lià tē, á nè mɛ, dē Yú kúrí aba, sè á twá á ya  
ɔ pàrì tē wa, dē ɔ dun tē wa.

*(1 Tesalonikè tián 1.6-10; 2 Tesalonikè tián  
1.4-5)*

<sup>13</sup> Nè nè swìn Yú sɔǵu tē á con, á ken á waa kú  
nè ndè Yú sɔǵu nè. Á wà kú cíǵá pín ndè ləzoni  
sɔǵu nè. Kú cíǵá ga ya Yú sɔǵu tē, kú nè tɔǵa á  
mù lià tē, á nè ken á waa Zwezi nè bɪcanɪ wa. Kú  
mù nè pín, nè kəni Yú lèèèe wuuu. <sup>14</sup> Nè nubia-  
ba, á dē yí ndè Kerisè lià púlé tē nè yí nētú, tē nè  
wulə \*Zwide nagwanaa wa, tē dē Zwezi-Kerisè

nə vwə duən yura. Kù m̀ nə pɪn, á tətə dwíí tián tə ma kə càn á nə, ndə \*Zwifə-ba də nə ken càn ba nə nətɔ. <sup>15</sup> Mə ba m̀ nə gva \*Yuu-Tiu Zwezi də Yɪ nii \*s̀s̀s̀nà tə, ba ga fɪfɪn nəba. Ba m̀ ba Yɪ pùé poli, ba ga ya liù mama dɔɲɔ. <sup>16</sup> Ba m̀ nə kəni diàn ba cì nə nə, sə nə dən ká swìn Yɪ sɔgɔ tə nə bɪrɪ lià tə, ba nə tà Zwifə-ba, sə kù jon ba ba cɔna tə wa. Ba fwa nətɔ, ba ma súrí ba cɔna tə wuuu. Yɪ b̀rà tə dən twi kù ja ba, də máǵá don wa.

*Polə swə, sə v p̀í v va Tesalonikə*

*(Romə tián 1.9-13; Tutɔnan 17.14-16; 14.22)*

<sup>17</sup> Nə nubɪa-ba, nə m̀ də á m̀ pwèe nə yá duən, máǵá mancɪn wa. Nə kùú təlɔ duən nə, yá nə bɪcanɪ ga tə bɔɲa á yoo wuuu. Á fɪra jɪn nəba zənzən! Yá nə yá s̀nɪ, sə nə p̀í nə na aba nə yía wa. Kù m̀ nə pɪn, nə dən ma bɪbarɪ, sə kù yoo təntə wàní kù tɔn. <sup>18</sup> Nə yá p̀à, sə nə p̀í nə bà á con. Á m̀ Polə dédén, sə à bà á con, kù nɛɛ cé duən, yá \*Sɪtana cì nə yáá nə, kù wà wàní. <sup>19</sup> Nə jə yala nə wulə pupwən wa á yɪrɪ. Máǵá tə wa, nə \*Yuu-Tiu nə wá p̀í v bà, á wá ya ndə dun yɔpuu nə, v nə wá pa nəba. <sup>20</sup> Á m̀ cígá nə ya nə dun də nə pupwən.

### 3

<sup>1</sup> Nə dən wuuu nə ga, nə kùú wàrɪ nə dənɪ. Nə nɪ də nə mɛ, sə nə ya Atenə wa yəbə cɪcɪ. <sup>2</sup> Kù m̀ nə pɪn, nə ma tɔn Timote á con. U yɪ nə nubɪu Kərisə yɪrɪ, v nə tɔɲa v pɪn Yɪ nə. U də swìn Zwezi-Kərisə sɔyɔwáɲú tə v bɪrɪ. Nə tɔn wá á con, sə v bà v kwè aba v pa á zɪɪ diàn, sə á kə

á waa Zwezi nè wuuu. <sup>3</sup> Nè pià, sè á liù mama dàn ká dugu Yu cwəŋə tə, càn zənzən tə yiri, nè nè wulə tə wa. Á tətə yèé də, ku yoo təntə me, sè ku tun nè mù lià tə yira, Yu nè kúrí. <sup>4</sup> Máná tə wa, nè nè yin á con, nè yà dí yáá nè swìn á con də, ba wá kə càn zənzən nè nè. Á də yèé də, ku mù máná təntə dàn nè yí. <sup>5</sup> À dàn nè kúù wàri à píní, à dànì á yoo wa. Ku mù nè pin, à ma tun Timote á con. À tun wá, sè v bà, v na nətə tə, á tə nè keni á waa Zwezi nè wuuu. Fən yà jə nè də, \*Sitana nè wá bà v dédén aba, sè v yigu aba v pa á tun yokukwɪun. Də ku nè jigə nətə, v wá pa nè tətəŋi tə mama jì tətə.

<sup>6</sup> Síún nè, Timote pií v nan á con, v bà nè con. U swìn v biri nəba də, yìèn tə mama zìən á con. U swìn də, á keni á waa Zwezi nè wuuu. U biri nəba, nətə á nè sonu də, nətə tə á nè tə líí nè yoo zəni zəni máná mama. U biri nəba, nətə tə, á nè pià, sè á pií á na nəba, ndə nè də nè pià, sè nè na aba nətə. <sup>7</sup> Nè nubia-ba, ku mù dàn nè pin, nè wəwalə tə mama wa, də nè càn zənzən tə mama wa, nè bicanı zùri, də á nè ken á waa Zwezi nè. <sup>8</sup> Á zıga diàn \*Yuu-Tiu nyiən tə wa. Ku mù nè pin síún nè, nè mu kúù pií ku siŋə cígá cígá. <sup>9</sup> Bèèè won nè, nè wá tun, nè ma kə Yu lèèè á yiri? Nè wàri nè nyina Yu lèèè nè kəni nè zwèe, pupwən tə yiri, nè nè jə á yuu wa Yu yáá con. <sup>10</sup> Tıtun də yıcau mama, nè yáá lòri Yu cígá cígá, sè v pa nəba cwəŋə, sè nè pií nè na aba nè yíá wa. Nè pià nè sùrí won tə, ku tə nè mùri aba, á nè keni á waa Zwezi nè, yoo wa.

<sup>11</sup> Nè nyina Yu tətə, də nè Yuu-Tiu nè wá kwen

cwəŋə, sə nə wàní nə bà nə na aba. <sup>12</sup> Yuu-Tiu wá pa á sonu tə, á nə swə duən tə súrí wuuu. Yá, sə kú sonu tə wàní kú yí là tə duən tə mama, ndə nə sonu tə yiri tə nə, nə nə swə aba. <sup>13</sup> Yuu-Tiu nə wá pa á zıgı diàn. U wá pa, á ya v là tə v nə tı, cuna dân ká ya á yuu wa, liù nə wá cəgə aba kú yırı, ba nə wá caga á nii nə tə yırı, nə nyına Yu yáá con kú máŋá tə wa, nə Yuu-Tiu Zwezi nə wá piı v bà də là tə mama, ba nə yı Kərisə nə tı.

## 4

*Nətv tə Yu nə swə, sə v là ya yoo*

*(1 Piyerə 1.14-16, 22; 4.1-5; 1 Korəntə tián 6.13-20)*

<sup>1</sup> Nə nubıa-ba, kú tə nə nə kúv wá swın, nə súrí lá, nə bırı aba nətv tə, á nə mə, sə á ya, sə kú poli Yu pùé. Á cígá twá kú nii nə. Nə dân tə lóri aba pwəpwə, nə ga kwè aba də \*Yuu-Tiu Zwezi yırı tə, sə á tə tvn kú, á doni nətən. <sup>2</sup> Á yèé kwìè tə, Yuu-Tiu Zwezi nə pın, nə ma kwè aba. <sup>3</sup> Kú tə Yu nə pià, kú mù nə yı, sə á yà là tə, v nə yá á tiàn míámíán Yu jìàn wa. U pià, sə á cı á tiàn nə, á dânà ká pəni duən nə vee vee. <sup>4</sup> U pià, sə á liù mama lwarı, v nə mə, sə v ja v tiàn nətv, v ma swe v kan, sə kú bırı də v yı Yu nə tı, ndə liù tə, v nə Yu tə nə mə, sə zilé ga ya kú wa. <sup>5</sup> Á dânà ká twá á pùé yokokwınan fıra tə nə, ndə liù tə nə, v nə yèrı Yu, nə yáá fwa nətv. <sup>6</sup> Kú mù yoo təntə wa, sə liù mama dân ká fwa yoo tə, kú nə wà mə v don yıra v nə yı v nubıu \*Kərisə yırı. U wà mə, sə v cùgò v yìèn.

Nə dí yáá nə swìn ku yoo tə á con cígá cígá, nə tún lá. Yuu-Tiu wá kə càn lià tə nə, ba nə tɔŋa tə yolwana təntə. <sup>7</sup> Á yəé də, Yı wà nəba kúrí, sə nə tún durən yìèn. U kúrí nəba, sə nə yà lià tə, nə nə yá nə tiàn míámíán. <sup>8</sup> Ku mù nə pın, liù tə, ɔ nə vıga kàrà ku tə, ku ya Yı nə ɔ vıga. Ku tà ləzwənə nə ɔ vıga. Yá Yı nə pın aba ɔ \*Siŋu tə.

<sup>9</sup> Ku nə yı nətv tə, á nə mɛ, sə á sóní duən yoo wa, ku kúè ba dèñ jə, sə nə púpúní ku nə bırı aba. Yı tətə nə dí yáá ɔ bırı aba nətv, á nə mɛ, sə á sóní duən. <sup>10</sup> Mə ku mù sonu təntə nə, á swə lià tə mama, ba nə yı à nubıa Kərisə yırı, ba nə wulə Masedwanə nagwanaa tə mama wa. Nə nubıa-ba, nə tə lèrì aba, sə á tun ku, á doni nətən. <sup>11</sup> Á kəni diàn, sə á ya duən nə də sié, sə á liù mama ywàñ ɔ tətə tutunan yuu, sə á tətə nə tun də á tətə jìàn, á ma pìà á nii wodiu, ndə nə nə bırı ku aba nətv. <sup>12</sup> Ku nətv tə nə wá pa lià tə, ba nə tà Kərisə lià zìlí aba. Yá á kúè ba ya liù mama yuu zılı.

*Ka pı́ ka bwin ka nan tian wa yoo  
(1 Korentə tián 15.19-58)*

<sup>13</sup> Nə nubıa-ba, nə pìà, sə á lwarı cígá tə, ka nə wulə lià tə, ba nə tıga tə yoo wa. Ku nətv wá pa, á dān ká ya pucɔnı wa, ndə lià duən nə, ba nə ba yala jə, də ba wá ya də Yı. <sup>14</sup> Nə pın cígá də, Zwezi tıga, ɔ pı́ ɔ bwin ɔ nan tian wa. Yá mə nətv tətə nə, Yı wá bwin tıga tə, ba nə keni ba waa Zwezi nə, ɔ súrı Zwezi nə.



15 Á nɔ̃ɔ̃ kɔ̃ tɔ̃, \*Yuu-Tiu nɔ̃ kàrì nɔ̃ba, nɔ̃ nɔ̃ pìà, nɔ̃ swìn nɔ̃ bɪrɪ aba. Kɔ̃ mù nɔ̃ yɪ, mánǎ tɔ̃ wa, Yuu-Tiu nɔ̃ wá pìí ɔ̃ bà, nɔ̃ mù là tɔ̃, nɔ̃ nɔ̃ tɔ̃ wà tɪ tɔ̃, nɔ̃ bá dɔ̃ tɪga tɔ̃ yáá. 16 Yɪ wá pa nii. \*Malɪkɛ pìú tɔ̃ wá swìn dɔ̃ kori nɔ̃farɔ̃. Ba wá wúrí Yɪ nabwana. Kɔ̃ mánǎ tɔ̃ wa, Yuu-Tiu tɔ̃tɔ̃ wá nan Yɪ nɔ̃ ɔ̃ cú. Yá \*Kərisɔ̃ là tɔ̃, ba nɔ̃ tɪga, wá dí yáá ba bwin ba nan tɪga wa. 17 Kɔ̃ kwa nɔ̃, nɔ̃ mù là tɔ̃, nɔ̃ nɔ̃ wulɔ̃ mɪ wa, nɔ̃ dǎn wá zàn, nɔ̃ twá ba nɔ̃. Nɔ̃ wá dɪ bakwan tɔ̃ wa, nɔ̃ jérí Yuu-Tiu lanworu tɔ̃ wa. Yá nɔ̃ dǎn wá ya dɔ̃ Yuu-Tiu mánǎ mama wuuu. 18 Á twá sùràn tɔ̃ tɔ̃ nɔ̃, á ma zùrì duən bɪcanɪ.

## 5

*Ka kə sírí mánǎ mama, ka dǎn Zwezi yoo  
(Matíə 24.36-51; Likə 12.35-40; 21.34-36; Romə  
tián 13.11-14)*

1 Nɔ̃ nubɪa-ba, kɔ̃ kúvɔ̃ ba dɔ̃n jɔ̃, sɔ̃ ba púpúní ba pa aba, sɔ̃ á lwarɪ mánǎ tɔ̃ dɔ̃ dɪn tɔ̃, nɔ̃ \*Yuu-Tiu nɔ̃ wá pìí ɔ̃ bà. 2 Á tɔ̃tɔ̃ yèé kɔ̃ zɔ̃nɪ dɔ̃, Yuu-Tiu túrí dɪn tɔ̃ wá ya, ndɔ̃ ɳwìàn nɔ̃ yáá ɳɔ̃, tɪtɪn nɔ̃ mánǎ tɔ̃ wa, ba nɔ̃ ba ɔ̃ yoo buɳa. 3 Mánǎ tɔ̃ wa, ləzoni nɔ̃ wá swìn, ba wú: «Lɔ̃vɔ̃ zùrì! Yolwan kúvɔ̃ bá bà». Mɔ̃ kɔ̃ mánǎ tɔ̃ wa, nɔ̃ ba wá cùgù míámíán naa nɔ̃dɔ̃. Kɔ̃ wá dɪ ba yuu, ndɔ̃ kan pùé nɔ̃ yáá yɪ nɔ̃tɔ̃, ɔ̃ lɔ̃rɪ mánǎ wa. Yá ba liù mama bá jén. 4 Nɔ̃ nubɪa-ba, á mù tà yikunu wa là, sɔ̃ kɔ̃ dɪn tɔ̃tɔ̃ ma twi kɔ̃ dɪ á yuu ndɔ̃ ɳwìàn nɔ̃. 5 Á mù mama yɪ poni là, á yɪ yɪcav là. Nɔ̃ tà yikunu là, nɔ̃ yɪ poni là. 6 Kɔ̃ mù yɪrɪ nɔ̃, nɔ̃ mù dǎnà ká dwèe, ndɔ̃ là duən

nə. Nə mù kúù wà mɛ, sə nə dwèe, sə nə ya là tɛ, nə nə buŋa zəni. <sup>7</sup> Mə titɪn nə nə, là yàá dwèe. Mə titɪn nə nə, là yàá nyu swana ba sú. <sup>8</sup> Nə mù là tɛ, nə nə yɪ yɪcav là, nə mɛ, sə nə ya là tɛ, nə nə buŋa zəni. Nə mɛ, sə nə kəni nə waa Zwezi nə wuuu, nə ga sóní là tɛ, kɪ mù nə wá ya ndə pamana lugu gànù nə, nə nə zva. Nə ga jə yala də Yu wá jon nəba nə cuna tɛ wa. Nə tì yala təntə nə, ma fwa ndə pamana lugu yupuu nə. <sup>9</sup> Yu nə kúrí nəba, sə ɪ twá də nə \*Yuu-Tiu Zwezi-\*Kərisə, ɪ jon nəba. ɪ wà nəba kúrí, sə ɪ cùgù nəba də ɪ lɪŋa tɛ, tɛ nə dáá zənzən. <sup>10</sup> Kɪ mù yɪɪ nə, Zwezi-Kərisə tɪga nə yɪɪ, sə nə vwə nə tián ɪ nə ma ya mu wa, də nə nə tɪga, nə à yèé də nə mu nə wulə máŋá tɛ wa, ɪ nə wá bà. <sup>11</sup> Kɪ mù yɪɪ nə, sə á dàn duən jìàn, sə á san duən nə, ndə nətɪ tɛ á nə dí yáá, á tɪŋa kɪ.

### *Sagɪ tɛ yígúré s̀̀r̀̀n*

*(Ebərə-ba 13.7, 17, 20-21; Galasi tián 6.1-2; Romə tián 12.17-21; 1 Korəntə tián 1.8-9)*

<sup>12</sup> Nə nubɪa-ba, nə lòrì aba, sə á zìlɔ̀ là tɛ, ba nə tɪŋa á pwərə wa. Ba mù là tɛ \*Yuu-Tiu nə tún, sə ba ywàń á yuu wa, sə ba kwè aba. <sup>13</sup> Á zìlɔ̀ ba zənzən, sə á sóní ba ba tɪtɪŋɪ tɛ yɪɪ, ba nə tɪŋa. Á pɪan bɪcan s̀̀é ya á pwərə wa.

<sup>14</sup> Nə nubɪa-ba, nə kwè aba, sə á caga yayɪnyɪna tɛ nii nə, sə á zùrì ba tɛ, fən nə jə ba jìàn. Á saŋa labwana tɛ nə, á jana pínú ba mama yoo wa. <sup>15</sup> Á cia á tián nə, sə liù mama dàn ká tɪn lwanɪ, ɪ ma ŋwín lwanɪ. Máŋá mama, sə á tɪn zəni duən yɪra də ləzoni tɛ mama yɪra.

16 Dɪn mama, sə á ya pupwən wa. 17 Á jùná Yɪ máná mama, á dànà ká yá. 18 Á kəni Yɪ lɛɛɛ won mama wa. Yɪ nə swə kv nətv tə, á nə vwə \*Kərisə yɪra tə yɪrɪ.

19 Á dànà ká cì Yɪ-\*Sɪŋu tə tutuŋɪ yáá nə. 20 Yɪ yáá twá v nii \*sùsùnù nə, v kàrì aba. Á dànà ká mun kàrà təntə. 21 Yoo mama wa, sə á dí yáá á ywàń kv wa, á kúrí kv tə, kv nə zɪən, á lɪ á pa á tiàn nə. 22 Yoo mama wa, cia á tiàn nə də lwanɪ yiri mama.

23 Yɪ tə, v nə pɪn bɪcan sió pa, sə á ya v mù nyiən míámíán. V mù nə wá cì, sə á tətə mama, də á pubuŋa tə, də á jərə tə, də á yɪra tə dàn ká ja lwanɪ, ba nə wá swìn tə yoo, dɪn tə nə nə Yuu-Tiu Zwezi-Kərisə nə wá pɪí v bà. 24 Yɪ kúrí aba. Yá v mù ga nə yɪ pùé nədv. Yá v mù nə wá tun kv yoo təntə.

25 Nə nubɪa-ba, á jùná Yɪ də á pa nəba. 26 Á jùná lià tə duən tə mama, ba nə yɪ á nubɪa Kərisə yɪrɪ, də zilé zənzən də sonu, ndə Kərisə lià nə mɛ, sə ba fwa nətv. 27 À lòrɪ aba pwəpwə də Yuu-Tiu yɪrɪ tə, sə á kàrì sagɪ kv tə lià tə mama yáá con, ba nə yɪ nubɪa Kərisə yɪrɪ. 28 Nə Yuu-Tiu Zwezi-Kərisə nə wá fwa pubwanv á yɪra.

**Yu soywánó sagı**  
**Nuni, Southern: Yu soywánó sagı New Testament**  
**Le Nouveau Testament en Nun**

copyright © 1999 Wycliffe Bible Translators, Inc.

Language: Nuni, Southern

Contributor: Wycliffe Bible Translators, Inc.

All rights reserved.

2020-11-30

---

PDF generated using Haiola and XeLaTeX on 21 Feb 2024 from source  
files dated 29 Jan 2022

d18530a7-7259-5f23-92b6-70e3abe5f3fa